



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

# MOELETSI OA BASOTHO

PARARE DOMINO PLEBEM PERFECTAM



Se tlosoa Setibing

5


SMARTD e ntlafatsa lihoai

7



# MOKKHETHOA O TLISA POSOSELO

www.moeletsioabasotho.co.ls



Re se re fumaneha ho marangrang

Email: newsroom@moeletsioabasotho.co.ls  
Tel: +266 28350466/ Whats app: 62600983

# MOELETSI

Basotho ha re khutleleng methehong

## Tšebetso ea tsela e se tla phetheloa



### Nthabeleng Seithleko

**T**šebetso ea ho aha bocha le ho lokisa tsela e tlohang Masianokeng ho ea Roma ho kenyeletsoa le tsela ea botelele ba 2km e potolohang ho feta Sepetlele sa St. Joseph ho ea fihla Ha Mafefoane, e se e le haufi le ho phetheloa, ho setse feela mesebetsi e menyenyane ea ho e

ntlafatsa.

Monghali Refiloe Mashea ea thusang morerong ona o re tšebetso ea ho aha bocha le ho lokisa tsela ena e qalile ka selemo sa 2025, 'me ho lebelletsoe hore e phetheloe ka 'Mesa selemong seholimo. Litaba tsena o li buile ka la 10 Tlhakubele monongoaha.

O hlalositse hore e 'ngoe ea lintlha tsa bohlokoa mosebetsing ona ke ho atolosoa ha tsela e le ho nolofatsa ho tsamaea ha likoloi le ho ntlafatsa chebahalo ea

tsela.

Monghali Mashea o boleletse hore ho aha bocha tsela ena ho tla ntlafatsa haholo maeto a lebang Sekololong se Seholo sa Sechaba, Sepetlele sa St. Joseph, hammoho le metse e potolohang phula ea Roma. Hape ho lebeletsoe hore e akofise maeto pakeng tsa litereke tsa Maseru le Qacha's Nek.

O itse khaho bocha ea tsela ena ho ke ke ha ntlafatsa feela polokeho le katleho ea maeto a bapalami, empa ho tla boela ho nolofatsa ho tsamaisoa ha thepa le litšebeliso, e leng se tla kenya letsoho haholo ntlafatsong ea moruo le bophelelo ba sechaba Lesotho.

Mesebetsi e kenyelelitsoeng morerong ona e akarelletsa ho aha litselana tse thusang likoloi ha li hloa libakeng tse itseng tsa tsela, ho aha marako a 'gabion', le litselana tsa metsi tse ahileng ka samente.

A qetella ka hore morero o kenyeletsa ho taka matšoao a macha tseleng, ho kenya matšoao a sephethep-hethe, ho aha litselana tse ncha tsa metsi tse tselang tseleng, ho atolosa litselana tsa maoto tsa batho, ho aha libaka tsa ho emisa likoloi hammoho le ho kenya mabone a literata a sebelisang matla a letsatsi.

## Basebetsi ba kopa keketso ea 5%

### Nthabeleng Seithleko

**B**asebetsi ba mafapha a fapakaneng Lesotho ba kopile hore meputso ea bona e eketsoe ka linoko tse hlano lekholong bakeng sa selemo sa lichelete sa 2026/2027, ba supa maemo a moruo a ntse a thatafala hammoho le ho se tsitse ha bokamoso ba African Growth and Opportunity Act (AGO), e atolositsoeng ka selemo se le seng feela. Litaba tsena ba li buile puisanong le Koranta ena ka la 10 Tlhakubele monongoaha.

Basebetsi bana ba emetsoe ke mekhatlo e fapakaneng ea basebetsi e kenyeletsang: National Allied and Clothing Textile Workers Union (NACTWU), Economic Freedom Trade Union (EFTU), United Textile Employees (UNITE), Lentsoe la Sechaba, Independent Democratic Union

of Lesotho (IDUL), Construction, Mining, Quarrying and Allied Workers Union (CMQ) le Lesotho Workers Association (LEWA).

Ho ea ka tlhahiso-leseling e fumanoeng, bahiri ba se ba sisintse hore meputso e eketsoe ka linoko tse 'ne lekholong mafapheng a mangata, ha lefapha la tšireletso lona le filoe tlhahiso ea keketseho ea linoko tse 2.5 lekholong.

Mongoli Kakaretso oa Economic Freedom Trade Union, Tšepang Makakole, o boletse hore baemeli ba basebetsi ba sisintse keketseho ea lilinoko tse hlano lekholong mafapheng 'ohle.

O hlalositse hore litheko tsa lijo le litšebeliso tse kang motlakase le metsi li nyolohile ha li bapisoa le selemo se fetileng, ka hona keketseho ea linoko tse hlano lekholong e'a hloka hahala, le ha a lumela hore le eona e kanna ea se lekane ka botlalo.

Makakole o boletse hore

kopanong ea morao tjena pakeng tsa basebetsi le bahiri, mahlakore ka bobeli hlolehile ho fihlela tumellano, 'me ba ile ba lumellana ho tsoela pele ka lipuisano. Lipuisano tsena li lebeletsoe ho tsoela pele hape ka la 17 Tlhakubele.

Ka lehlakoreng le leng Mongoli Kakaretso oa Independent Democratic Union of Lesotho (IDUL), Rathakane 'Mei, o netefalitse hore lipuisano pakeng tsa basebetsi le bahiri li ntse li tsoela pele.

Ho sa le joalo, basebetsi mafapheng 'ohle ba ile ba fuoa keketseho ea linoko tse hlano lekholong meputsong ea bona nakong ea selemo sa lichelete sa 2025/2026. O re takatso ea bona ke hore mesebetsi eohle ea sechaba e tšoaroe hantle hore leha maemo a le thata ba atlehe ho thuseha.

O re litokelo tsa mantlha tsa botho haholo tsa basebetsi li lokela ho eloa hloko le ho ananeloa ka litsela tsohle.

**B**asotho ke sechaba se neng se tseba temo haholo mehleng ea khale, ka nako eo ene e ba khora fela, hobane le batho ba neng ba hloka masimo ba ne ba sa robale ka tlala. Ha esale e le sechaba se nang le lerato le kutloelano bohlokoa. Meso ha e ntse e tsoala mesoana ea ba lintho li ea fetoha, li ntse li ritsa hanyane ka hanyane, he! litaba tsa sejoal-joale kapa tsona lipheto tsa re lahlisa tsela eo re e fuoeng ke baholo ba rona.

Tlhahiso e ne e le kholo masimong hobane ba ne ba sebelisa le ho hlokomela mobu oa bona hantle le ka hloko, mobu o ne o lula o le manoni hore o tsebe ho hlahisa lijo tse ntlafatseng tse ngata.

Sechaba sa Ha Tlhaku Quthing se khuletse metsong ea khale ha ho tluoa nteng ea temo. Ba sebelisa manyolo a tlholeho ho nontša mobu, e leng moiteli oa liphoofole le molora. Sechaba sena se ithutile hore manyolo a tlholeho a fa mobu matla e seng sejalo joaloka a na a morao-rao.

Litaba tsena sechaba sena se li fihletse ka tlas'a tataiso ea Mokhatlo oa Lintlafatso Maloting a ka Boroa ho Naha ea Lesotho SMARTD. 'Me lihoai li khotse molemo, ba hlokomelisitsoe le hore lipeo tsa lehae li bohlokoa kaha lia potlaka ha li kene mobung, li atleha ho itoanela mafung ao ka mohlomong a ka lekang ho li hlasela, ho mamella maemong a komello le a pula tse matla le a seng a le teng a pheto-phetoho ea boemo ba leholimo.

Khosatsana Senate o thakhotse morero o bitsoag Shoeshoe ea Seshoeshoe, oo sepheo sa ona e leng ho tla khahlametsa baithuti likolong tsa tikoloho ea Matsieng ba hlohang, e le ho arabela litlhoko tsa bona tsa ka mehla. Morero ona o tla fana ka seaparo sa sekolo le mesengoana ea banana eo batlang ho e sebelisa ho boloka bohloeki.

Khosatsana o re o tla kenya letsoho ka matla litabeng tsa thuto, joalokaha a ile a anetsa thuto ea bochaba kahar'a bana ba Basotho selemong sa 2025 e le karolo ea ho ba kenya moea oa boikhopolo.

Rene re qeta lilemo tse 200 haufinyane sechaba sa Basotho se thehiloe, 'me haufinyane re tl'o keteka lilemo tse 60 Naha ea Lesotho e ipusa. Ee ke rona bana, menyakubetso ke e fe e bonahalang? Likatleho ke life? Na rea hola, rea pele kapa morao, kapa re ntse re tapa-tapa sebakeng se tšoanang? Litlolo tsa molao li kae, botloko-tsebe, lipolao, bofuma, tlhekefetso, na moruo oa naha oa hola? Che ke lipotso tseo re ka ipotsang tsona uena 'mali ea khabane.

Joalokaha re ile ra cho Koranteng ea beke e fetileng, ruri liphethoho rea li bona li ea tšepisa mona le mane. Boiteko bo bangata lintlheng tse 'maloa 'me hona ho paka kholo.

Naha ea Lesotho ke naha e ntle haholo e khabileng ka lithaba, maralla le liphula tse ntle haholo. Joale hona le tšupa e etsang hore mobu oa Lesotho o hoholehe ha bonolo, hobane setlama-tlama sena se bitsoang sehalahala se hatella joang le meriana, se fokotsa haholo makhulo a fumanehang bakeng sa linku, lipoli le likhomo. Re leboha haele mona Lekala la Tikoloho le hlokometse ho ntša setlama sena ka metso. Joalokaha se ba le tšusumetso e mpe tlhahisong ea boea ba linku le lipoli haholo hobane lihoai tsa ka maloting li iphelisa ka thekiso ea boea ba tsona.

Mokhethoa oa Malingoaneng o tlisitse thabo ho sechaba sa Lebatooa la habo, ka ho fana ka limpho tsa lieta ho baithuti ba Sekolo sa Mathomo sa 'Mei. Taba eo ke ho bontša tsotello le qenehelo ho bana ba hlohang. Ke moo a kothalelitse sechaba sa habo ho nka thuto e le sebetsa se matla se tla ntlafatsa bokamoso ba bana sebakeng seo. A re sena o se e ntse e le ho khutlisa boitšepo ho baithuti bohle hore qetellong ho be bonolo hore ba kene sekolo.

Qholotso e kholo Mokhotlong, e pakoang ke Mookameli oa Sepolesa sa Tlokoeng, ke tlhekefetso ka motabo, lenyalo ba bana ba tlase lilemong, ho hirisetsoa ho alosa liphoofole le lintoa tsa litsekisano tsa makhulo tse qetellang ka lipolaeano, 'me sepolesa se ntse se tsoela pela ho fana ka thuto.

MOLIMO A BOLOKE LESOTHO LE BASOTHO

Contacts: +266 28350 466

62600983 WhatsApp

Email: [newsroom@moeletsiobasotho.co.ls](mailto:newsroom@moeletsiobasotho.co.ls)

Sales and Marketing: (+266) 28 350 466/ 57396597 (WhatsApp)

**MOELETSI oa BASOTHO**

A LOKHETSE MORENA SECHABA SE PHETHELENG (LUKE 1,17)

EMAIL: [editor@moeletsiobasotho.co.ls](mailto:editor@moeletsiobasotho.co.ls)

[sub-editor@moeletsiobasotho.co.ls](mailto:sub-editor@moeletsiobasotho.co.ls)

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seithleko

Tšelis Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

# Mosali o ahloloa ho tsosa hlooho ea mofu

## Nthabeleng Seitlheko

Lekhotla le Phahameng la Maseru le ahloletse mosali ea bitsoang Lintle Letima (27), lilemo tse supileng chankaneng, tse ileng tsa fanyehoa, kamor'a hore a fumanoe a le molato oa polao e sa roeroang ea mohlankana oa hae Motseki Kholotsa (32) ka la 10 Tlhakubele monongoaha.

Kotlo ena e emisitsoe ka lilemo tse tharo ka hore Letima a lefe malapa a mofu chelete e M50,000.00 e le matšeliso nakong ea lilemo tse tharo. Haeaba a hloleha ho etsa joalo, kotlo ea chankana e tla qala ho sebetsa.

Qeto ena ea lekhlotla e ile ea tla kamor'a hore moqosuo ea neng a qosoa ka polao qalong, a ipolele a le molato oa polao e sa roeroang. 'Muelli oa hae Adv. Motjantji Kao o netefalitse hore qeto eo e ne e le ho latela litaello tsa moreki oa hae, ha 'muso o ne o emetsoe ke Adv. Tsebiso Fuma, ea ileng a amohela kopu eo.

Bopaki bo ileng ba hlalisoa lekhlotleng bo bontšitse hore moqosuo le mofu ba ne ba ratana 'me ba lula 'moho Moshoeshoe II. Ho ile ha boleloa hore ka la 8 Pulungoana 2024, moqosuo ea neng a sa tsoa fumana hore o imme ngoana oa mofu, o ile a fumana mofu a le bareng Seapoint a e-na le kharebe e ncha hammo ho le metsoalle ea hae, ba keteka kaha kharebe eo e ncha e ne e sa tsoa fumana lengolo la thuto setsing se seng sa thuto e phahameng letsatsing leo.

Lekhotla le ile la utloa hore boiteko moqosuo le kile ka makhetlo ho buisana le mofu empa mofu o ile a hana ho bua le eena. Ho ile ha boleloa hape hore mofu le metsoalle ea hae ba ile ba fallela sebakeng se seng moo moqosuo a ileng a fihla a batla ho bua le eena hape, empa a hloleha.

Bopaki bo ile ba bontša hore ha moqosuo a letsetsa mofu, mofu o ile a fa kharebe ea hae e ncha mohala hore e arabe, 'me puisano lipakeng tsa moqosuo le kharebe eo e ne e se ntle.

Ho ile ha boleloa hore ho seng ha la 9 Pulungoana 2024, ha mofu le metsoalle ea hae ba se ba khutletse hae, moqosuo o ile a fihla. H'a kokota monyako, mofu o ile a bula empa h'a bona hore ke eena, a leka ho mo thibela ho kena katlung, 'me



ha e-ba ngangisano lipakeng tsa bona.

Lekhotla le ile la bolelloa hore nakong ea ngangisano eo, moqosuo o ile a nka thipa a hlaba mofu. Mofu o ile a potlakisetsoa sepetlele empa a phatlalatsoa a se a hlokaetse h'a fihla.

Ho ile ha boela ha boleloa hore kamor'a ketsahalo eo, moqosuo o ile a leka ho ipolaea empa metsoalle ea mofu e ile ea mo kholisa hore a se ke a etsa joalo, qetellong a inehela mapoleseng.

H'a buella kotlo e fokolitsoeng, 'muelli oa moqosuo

o ile a bolella lekhlotla hore moreki oa hae le lelapa la hae ba ile ba leka ho buisana le lelapa la mofu hore ba tle ba kenye letsoho litšenyehelong tsa lepato, empa boiteko boo bo ile ba hloleha. O ile a eketsa hore lelapa la mofu le ile la hana le boiteko ba ho buisana ka tharollo ka 'muelli oa molao. Leha ho le joalo, hamorao malapa ka bobeli a ile a fihlela tumellano ea hore moqosuo a lefe M30,000.00 e le matšeliso.

'Muelli oa moqosuo o boetse a bolella lekhlotla hore kamor'a ketsahalo eo

moqosuo o ile a lahleloa ke mpa, hape a bolela hore o ne a noa joala letsatsing leo la ketsahalo. O ile a eketsa hore moqosuo o sa le monyenyanane, o sebelisane hantle le mapolesa nakong ea lipatlisiso, 'me o ile a latela maemo 'ohle a beile.

Ka lebaka leo, o ile a kopa lekhlotla hore le mo hauhele ka ho se mo ahlolele chankana, e le hore a tle a tsebe ho lefa matšeliso ho lelapa la mofu.

Ka lehlakoreng la 'muso, Adv. Fuma o ile a kopa lekhlotla hore le fane ka kotlo

e bontšang bohlokoa ba bophelo ba motho le ho romela molaetsa hore likhohlano li lokela ho rarolloa ka khotso.

O ile a boela a supa hore mofu o ne a sa le monyenyanane 'me batsoali ba hae ba ne ba na le litebello tse ngata ho eena. O ile a bontša hore lelapa la mofu le ikemiselitse ho amohela toka ea poelano 'me le lumella moqosuo ho lefa matšeliso ka lebaka la lefu la mora oa bona.

Nyoeo ena e ile ea mamelea ke Moahloli Tšelisano Mokoko.



**Mazenod BOOK CENTRE**  
*Prepare good People for The Lord*

**BACK TO SCHOOL**

LI SE NTSE LI FUMANEHA MABENKELENG A RONA

LIBUKA TSA SESOTHO

MOSALI A NKHOLA = M155.00

THOLOANA TSA SETHEPU = M130.00

BOCHABA BA BASOTHO = M203.50

ENGLISH BOOKS

CRY BELOVED COUNTRY = M343.50

GCSE Directed Writing Manual = M237.00

Situational Composition = M222.00

UNDERSTANDING AND COMMUNICATION 4 = M280.50



**M96.00**



**M100.00**



**M108.50**



**M195.00**



**M155.00**



**A5 M156.00**  
**A4: M75.00**

U ka re letsetsa ho fumana moo lishopo tsa rona li leng hona teng seterekeng sa hau.

27 350 562 / 57396597 / [bookcentre@mazenodprinting.co.ls](mailto:bookcentre@mazenodprinting.co.ls)

# MOELETSI O TŠEHETSA BACHA



## Tšeliso Thakholi

**B**acha ba tšoanela ho iqapela le ho itlthahisetsa likhoebo tse ncha tsa mofuta oa tsona ba ntse ba le metseng ea habo bona. Ba itlthahisetsa likhoebo ka lihlahisoa tse teng metseng eo ba phelang ho eona. Ha ba se ba itlthahiselitse mofuta e mecha ea likhoebo ba lokela ho li ntlafatsa ka thuto e le teotsa e tla li beha mae-mong a phahameng moo 'muso e le ona o lokelang ho batalatsa mabala, o tla lokela ho thusa ka ho kenya letsoho hore li tle li tsebe ho eloa hloko ke machaba hore li kene mebarakeng kahare le kantle ho naha.

Morero e ntse e le hore bacha ba ithehele mesebetsi metseng moo ba phelang teng, e seng ho hiroa kaha bohloko ba senyeheloa

ke nako e ngata ka ho tloha metseng ea habo bona ba ea litoropong tse kholo tsa naha ba re ba il'oa batla mesebetsi empa ba khutla ba kobile linala. Ka nako e 'ngoe ba ee ba qetelle ba oetse litlolong tsa molao. Teboho Ntipase ke e mong oa bacha ba Lesobeng Seterekeng sa Thaba-Tseka ea ithuhetseng lipere ka sepheo sa ho theha khoebo.

## QALEHO

Ke kene sekolo sa mathomo le se phahameng Thaba-Tseka toropong, ha likolo li koetsoe ke ne ke khutlela hae Lesobeng, moo teng ke neng ke hlokomela liphoofofo, haholo lipere. Ha ke qeta Sekolong se Phahameng sa Paray ke ile ka etsa Lengolo la Lipalo le Sekolo sa Lesotho Institute of Accounting, Maseru, ka lebaka la tlhokahalo ea mesebetsi

ka khutlela haeso, eaba ke khetha ho iqalla khoebo ka lipere ka selemo sa 2019. Ha ke batle bacha ba bang ba tle ba tlohe metseng ea habo bona ba ee litoropong joaloka 'na, ka khopolo ea hore ba tla fumana mesebetsi empa ba ntse ba siea mesebetsi eo ba ka tsebang ho itlthahisetsa eona metseng ea habo bona.

## KHOEBO KA LIPERE

Ke entse khoebo ka lipere ka mokhoa oa ho etsetsa batho boithabiso ka tsela ea ho etsa menyakoe meketeng e meholo e kenyetsang ea manyalo, lipapaling tsa bochaba le meketeng e moholo ea 'muso e bang teng seterekeng. Taba ena ke boetse ke e kopantse le bohahlaoli hoba haba le teng koano metseng ba re etetse ke ba hirisetsa lipere ho lipalama. Athe ba bang

re ba ruta ho palama.

Ho feta moo ke kenela mejao ea peiso ea lipere, 'me ha ke hlotse ke iphumanela meputso. E meng ea meputso eo ke ileng ka e fumana e arabetse litlhoko tsa ka, hobane ka eona ke atlehile ho reka lipere tsa maemo a ntlafalitsoeng, ka li ahela litala le ho phetha a mang a mabaka a ka a letsatsi ka leng. Ke bile le thahasello e kholo ho kenela peiso ea lipere ha ke hlokomela hore Naha ea Lesotho e se e hlokometse bohlokoa ba peiso ea lipere, 'me e se e fuoa botšehetsi.

## TŠEBETSO

Ke qalile ke le mong empa hona joale re se re le bacha ba bararo ba ikopantseng, re na le lipere tse robeli tse 'ne ke tsa lebelo, ha tse ling tse 'ne e le tseo re li sebelisang bakeng sa bohahlaoli

le ho etsa menyakoe meketeng e fapakaneng. Tšebetsong ena ea rona re boetse re thusa barui ba lipere ho nyalisa lipere e le hore ba be le tse ntlafalitsoeng. Re boetse re koetlisetsa batho lipere tsa bona ka mekhoa ea ho matha e kang ea terepele, ho paraketsa le ho li ruta ho etsa menyakoe.

Re rekisa lipere ho batho ba ratang ho kenala mejao le haese kamehla, etsoe morao tjena theko ea lipere e batla e matlafetse haholo papisong le pele. Re li rekisa ho ea ka hore na li koenne hakae le hore na li sa le nyenyane hakae bakeng sa mejao le ho etsa menyakoe.

## KHOLO EA KHOEBO

Le ha ka linako tse ling sethathong motho o ne o e-na le ho lahlehela ke tšepo, ke tsela eo khoebo ea rona e neng e tsamaea ka teng re ile ra tiisetsa kaha re bile ntsoe-leng hore ha re batle ho siea sebaka sa habo rona ra ea ntlafatsa libaka tsa batho ba bang. Khoebo ea rona e holile hona joale 'me ka lebaka la litsebo tseo re nang le tsona, kaha boraro ba rona re kene sekolo, re atleha ho thusa batho ba bangata haholo ba metse e fapakaneng ka litaba tse na tsa lipere.

## LIKATLEHO LE LIQHOLOTSO

Ka 'nete ho fihlela hajoale ha ho liqholotso tse ngata, empa e kholo ke maemo a phetoho ea leholimo, le ha e sa ame khoebo hakalo. Haele likatleho ke tsa hore kannete phetoho e teng ka malapeng a bo rona, 'me 'na ka chelete eo ke e fumang ke atlehile ho kenya ngoaneso oa o fela sekolo.

## KELETSO HO BACHA

Boemo bo teng hajoale ba tlhokahalo ea mesebetsi kahare ho bacha ke tšisinyo ea hore boinahanong ba bona, ka litsebo tseo ba nang le tsona, tsa thuto le tsa bohloko ba tlhaho ba ikemele ka ho itlthahisetsa mesebetsi le ho loanela bokamoso ba bona. Bacha khaotsang ho 'na le ntse le furalla metse ea habo lona le re le ea litoropong ho ea batla mesebetsi empa le ntse lesiea mesebetsi hona metseng moo.

Ka temo le ka iphelisa, ka leruo la liphoofofo le ka iphelisa le ka mesebetsi e meng e mengata e fumanehang hona metseng moo le phelang teng. Joalokaha ke se ke boletse le se ke la sheba feela mofuta e seng e ntse e tloaelehile ea likhoebo le ka hona ka lipereng bophelo bo teng.

# Se tlosoa Setibing



## Nthabeleng Seitlheko

**L**ekala la Tikoloho le Meru ka tšebelisano le Vodacom Lesotho le mokhatlo oa Earth Care Alliance le qalile letšolo la ho tlosa semela se kotsi se tsejoang ka hore ke Sehalahala Setibing Tšana Talana. Litaba tsena li bile ka la 11 Tlhakubele monongoaha.

Morero ona o reretsoe ho tsosolosa makhulo le ho ntlafatsa bophelo ba balisana le sechaba se phelang ka ho rua liphoofofo. O na o tsamaellana le boiteko ba 'muso ba ho sireletsa tikoloho ea Lesotho ha ka nako e tšoanang ho hlokomeloa boiketlo ba balisana ba itšetlehileng ka makhulo bakeng sa ho hlahisa liphoofofo.

Sehalahala ke semela sa lihlahla se kenellang se sa batleheng se ntseng se ata ka potlako makhulong a lithabeng tsa Lesotho, 'me se beha tikoloho le mekhoha ea bophelo ea temo kotsing e kholo. Semela sena se hatella joang le meriana, se fokotsa haholo makhulo

a fumanehang bakeng sa linku, lipoli le likhomo.

Sehalahala se nka sebaka sa limela tsa tlhaho, se sebelisa metsi a mangata 'me se senya sekoaelo sa tlhaho sa mobu, se

boea ba linku le lipoli.

H'a bua ketsahalong ena, Mookameli oa Setereke sa Maseru, Tšepo Lethobane, o hatelletse bohlokoa ba ho tšireletsa tikoloho e le hore ho be le

long."

Lethobane o boetse a re o khothatsa balisana ho hlokomela tikoloho le ho ntlafatsa maemo ao ba sebetsang ho 'ona, ho ka ntlafatsa haholo bophelo

molemong oa bophelo bo botle ba liphoofofo.

O re ha hona hore boea bo ka atleha ha lekhulo le se le tle, kahoo ke boikarabello ba bona ho bona hore ba atleha ho thusa



bakang ho khoholeho ea mobu le eketseha ha mangope.

Semela sena se boetse se ama boleng ba lijo tsa liphoofofo, se etsa hore liphoofofo li be kotsing e kholo nakong ea komello, 'me se be le tšusumetso e mpe tlhahisong ea

tlhahiso e tsitsitseng ea liphoofofo.

O itse "Tikoloho e bohlokoa haholo, 'me re tlameha ho ikemisetsa ho e sireletsa. Hore liphoofofo li hlahise lebeso, nama le boea ka bongata, li lokela ho ja joang bo phetseng hantle makhulo

ba batho ba phelang ka ho rua liphoofofo.

E mong oa balisana ba sebaka seo, Neo Ramarou, o re ho bohlokoa hore e le balisana ba hlokomela tikoloho tseo ba phelang ho tsona, e le ho thusa hore ba atlehe hoba le lekhulo le letle

tikoloho ho ntlafala. Leha ho le joalo, Naha ea Lesotho ke naha e phamoletseng holimo lipehelo tsa ntšetsopele ea mo-shoelella ho thusa hore tikoloho le boieane ba tlhohleho li ntlafetse. Haholo ha Lesotho le phela ka thekiso ea metsi .

# Mokhethoa o tliša lebonyo sechabeng

## Nthabeleng Seitlheko

**E**le ho tliša boitšepo le lerato la thuto ho baithuti, Mokhethoa oa Malingoaneng No. 77 Ramakalima Monethi, o nehelane ka lieta tse 60 a ba a keteka letsatsi la Sehopotso sa Morena Moshoeshoe I 'moho le baithuti le sechaba, Sekolong sa Mathomo sa 'Mei, Lebatoeng la Malingoaneng ka la 11 Tlhakubele monongoaha.

O hlalositse hore o hloka ho bona batsoali ba tšoarana ka matsoho le litichere 'moho le baithuti, ho bona hore thuto e fetoha sebetša se matla se tla ntlafatsa bokamoso ba bana sebakeng sena. O re sena ba ka se fihlela ka ho khutlisa boitšepo ba moithuti e mong le e mong hore qetellong ho be bonolo hore ba kene sekolo.

"Baithuti ba bangata likolong tsa mathomo ba aparetsoe ke bofuma, haholo tlhokahalo ea seaparo sa sekolo le lisebelisoa, kahoo ho kenya letsoho ho tla etsa hore ba be morolo hore ba kene lihlopha ntle le qeaeqeeo," a hlalosa joalo.

O tsoetsepele hore bohle ba lokela ho nka boikarabelo polokehong le tšireletsong ea ngoana o fe kapa o fe, a re ha se hantle hore batsoali ha ba khalema bana ba ba khakhathe, kapa ho ba omanya bana ka mantsoe a ba imelang kaha hoo e le tšekefetso, ba lokela ho nena ka hohle-hohle tšebeliso empe ea bana.

O re mosebetsi ona o qalileng Ha 'Mei o lokela ho tšoaetsa libaka tsohle, hore sechaba se kopane 'moho ho keteka Sehopotso sa Morena Moshoeshoe<sup>1</sup>, ea neng a re khotso ke khait-

seli ea hae. O re taba eo e bolela hore ke sechaba se kopaneng 'moho ho bopa khotso le ho ikhopotsa seo ba leng sona.

O phethetse ka hore o ikemiselitsee ho bona sechaba sa habo se phelisana ka khotso, se utloisisa melao ho matlafala boikemelong ba bona le ho itloaetsa ho tlaheha moo litlolo tsa molao li etsahetseng.

Mookameli oa Sepolesa Tlokoeng, Senior Inspector Masoli Khoanyane o hlalositse hore meketeng ea sechaba ke hona moo ba atlehang ho kopana le sechaba ka ho fapakanana. O re sebaka sena se aparetsoe ke tlolo ea molao ea tšekefetso ka motabo le tseling e leng taba e ba ngongorehisang hobane ba bang batho ba hlekefetsoang ha ba tlahehe litaba tsena.

A re ha joale tšekefetso ea bana e bonahala e atile, kaha ba bang ba khakhatheoa ke batsoali kapa baholisi ba bona, ba bang b'a nyalisoa, ba bang ba isoa metebong ba seiisoa sekolo ba le tlaase lilemong.

O bile a teea mohlala ka hore hona joale sepolesa sa habo se sebetšana le tlolo ea molao ea bana ba khakhatheoeng ke ntate oa bona hobane ba ne ba ile bashemaneng. A re eo o khakhathele bana hoo ba bolileng mokokotlo 'me mahlatsipa a se a ntse a alafshoa. O re eo litaba tsa hae li tsebahetse kamor'a ho tšoaroa, hobane a ne a thuntse motho, ke moo bana ba ileng ba atleha ho tlaheha ketsahalo ena hobane o ne a lula a ba tšosa.

"Leha motho a ka u tšosa tlaheha tšekefetso hobane a ke ke a hlola a u etsa hampe, sepolesa se teng ho u sireletsa kamehla," o hlalositse joalo.

H'a bua le sechaba se bileng moketeng ona, o itse ke tlolo ea molao ho

tima ngoana thuto kaha e le eona e betlang bokamoso ba ngoana, ke tlolo ea molao ho bolotsa ngoana ea tlaase lilemong, empa se makatsang ke hore batho ba ntse ba itsoellepele. A re ho hlola litaba tsena ba hlahloba mangolo a tlhaho a bana ba joalo, 'me moo ba fumanang ketso ena ba nka likhato tsa molao. "Ho bohlokoa hore Basotho ba hlomphe moetto oa bona ka ho etsa se nepahetseng."

O re tšekefetso ka motabo ke kobo anela seterekeng sa Mokhotlong, o re ba fane ka thuto ho batho bohle empa ba iphanyetša eona ba ntse ba e tseba. O re ho bohlokoa hore batsoali ba se ke ba sosothela bana nako eohle hobane taba eo ke tšekefetso ea maikutlo.

O phethetse ka ho ipiletsa ho balisana bohle ho baballa tikoloho, mekhoabo le makhulo hobane ke hona

bana toronkong eo ba ba ke ntseng eona. A re ho ea ka Lekala la Tekano, Bacha le Ntšetsoepele ea Sechaba, ho bonahala bana ba ntšoa likolo ka lehare ka lebaka la bohloki, ba bang ba ntšoa ntle ho mabaka a hlakileng.

A re joale e bonahalang e ntse e anele ke ea batsoali ba ntšang bana likolo hore ba eo lisa ebe qetellong ha ngoana a se a hirisitsoe h'a fumantšoe moputso o fuoa ea mohirisitseng. O re batsoali basebetse ba tlohele ho jarisa bana mesebetsi e sa ba lokelang, ba bang ba nyalisa bana ba bona, seo ke tlolo ea molao e ka ba behang kapel'a makhotla a molao.

Mookameli oa Sekolo sa Mathomo sa Mei o hlalositse hore ba bokane moo ho etsa boikhopotso le ho tseba moo ba tsoang e le Basotho, le ha lintho li ntse li fetoha bana ba qetella ba lahleha ba sa tsebe seo ba

'me bona e le sechaba sa Ha 'Mei le mathoko a eona ke mehlala e metle kaha ba ketekile 'moho le baithuti.

E mong Tsebo Kente, ea lisang, ea lulang Metebong, o hlalositse hore ba thabela mokete ona, kaha o ba kopanya le sechaba, a re bona ha ba lule ba e-na le batho, ba hloloheloa hoba 'moho le bona. A re letsatsi lena le ba ruta ho boloka khotso, ho phelisana hantle le ho lula e le sechaba se utloelanang bohloko.

A re bona naheng ba phela ka lintho tsa Sesotho hangata le tseo ba iketsetsang ka matsoho a bona, a re ha ho ketekoa letsatsi la sehopotso sa moshoeshoe ba nolofalloa ke ho nka karolo. O re ba thabile kaha ba fuee thuto e matla e ba hopotsang ho hlokomela le ho baballa tikoloho e leng qholotso e kholo ea batho ba Chesang makhulo.

E mong oa bana ba



moo bophelo ba liphoofolo bo leng hona teng. A re ba qobe lintoa metseng hobane li luka khotso.

'Musi oa Setereke sa Mokhotlong, Kepa Keqe, o ipilelitse ho batsoali ho ntša

lokelang ho se etsa le moo ba tsoang teng. A re ba rata ho tseba hore na ha ho buuo ka sechaba sa Basotho ho buuo ka eng.

O re bohle ba bone bochaba ba bona ka liletsoa le meaparo. Ha joale Basotho ha ba sa tseba litaba tse ngata, tse buang ka moetto le leeto la bona la bophelo.

E mong oa batsoali ba bileng sebakeng sena, Malenkoe Tšiu, o itse ba leboha mokete ona hobae o etsa hore hobe le se ba kopanyang leha ba ka arohana ka boemo ba lipolotiki. A re o thabela ho bona baithuti ba bonahala ka litalenta tse fapakaneng, ho etsa metjeko ea Bochaba hobane ho tla thophothela ka likellelong tsa bona hore ba lokela ho rata Basotho ba bona.

O re ketekelo ena e ba hopotsa maputulo a Morena Moshoeshoe, a sechaba se bopang khotso le kopano,

nkileng karolo moketeng ona, o itse ba thabile ha ho ketekoa letsatsi lena, hobane ba tla tseba ho bua le ho ngola ka lintho tseo ba li bonang.

"Khale re ne re khalla batho ba bang, empa le rona re se re thaba hobane ho ketekoa letsatsi la Moshoeshoe ka meaparo ea Sesotho." A hlalosa.

O re ka mekete ena, ba nolofalloa ke ho ithuta, a re ba leboha limpho tseo ba li filoeng hobane bana ba bang ba tlohela sekolo hobane ba hloka.

Ke hona ketsahalang ena, moo baahi ba sebaka sena ba phehisitseng ketekelong ena ka lijo tsa Sesotho, ka metjeko e fapakaneng le ho leboha mokhethoa ka limpho tseo a faneng ka tsona, ka le reng o ela hloko lithoko tsa bona 'me taba eo ke pontšo ea lerato kaha batsoali ba bangata ba sa sebetse.



# SMARTD e ntlafatsa lihoai

## Tšeliso Thakholi

**M**okhatlo oa Lintlafatso Maloting a ka Boroa a Lesotho (SMARTD), o ile oa memela lihoai leetong la boithuto ka tlhahiso ea temo e etsoang ka lipeo tsa lehae le monontša oa tlhohleho, metseng ea Ha Tlhaku, Quthing ka la 7 Tlhakubele monongoaha. Sepheo e le ho thakelana ka malebela ho rarolla liqholotso tseo ba kopanang le tsona libakeng ka ho fapakanana, le ho ntšetsa pele leano la SMARTD la ho khothaletsa lihoai ho loantša tlala ka ho sebelisa menontša ea tlhohleho le lipeo tse bolokehileng tsa lehae.

Lihoai li ile tsa potoloha le masimo a seng makae a metse ea Ha Tlhaku le Ha Ratjeka ho boha botle ba lijalo tsa poone, linaoa le tlhahiso ea peo ea litapole moo ho sebelisitsoeng

menotša ea tlhohleho e leng molora, moiteli oa liphoofole le lipeo tsa lehae.

Mookameli oa Manane oa Mokhatlo oa SMARTD Monghali Simon Fako o ile a kopana le lihoai moo a boletseng hore lipeo tsa lehae li bohlokoa haholo kaha lia potlaka ha li kene mobung,

li atleha ho itoanela mafung ao e bang ka mohlomong a ka leka ho li hlasela, ho mameella maemong a komello le a pula tse matla le a seng a le teng a pheto-phetoho ea boemo ba leholimo.

O boletse hore Basotho ba ke ke ba tseba ho fihlela phepo e nepahetseng kan-

tle le hore ba ithahisetse lipeo, 'me haeba ba ithahisetse lipeo ba lokela ho ela hloko ho sebelisa lintho tsohle tse ke keng tsa kenana le tikoloho, ka ho e silafatsa ka hore ba sebelise monontša oa tlhohleho le lipeo tsa lehae kaha tlhohleho e thusa ho fepa mobu le

sejalo. Empa menontša ena e meng e kang 'lifetlelaese' li senya mobu hoba tsona li etselitsoe feela hore li fepe sejalo e seng mobu.

A bontša hore bohle ba tšoanetse ho sebetsa ka thata ho atisa lipeo tsa lehae, empa le teng ka tsela eo li ke keng tsa senya tikoloho e le hobane li tlii'oa akofisa litaba tsa phepo e nepahetseng, le hore ba ithahisetse lipeo tseo e leng tsa lehae. A re taba ena ea ho ithahisetsa lipeo tsa lehae e tlii'oa thusa Naha ea Lesotho hoba le sesiu sa lipeo tsa Sesotho kahare ho naha kaha hajoale re sena sona.

A supa hore ho bohlokoa haholo hore Basotho ba be le sesiu sa bona sa lipeo e le hore mohlantlinaha tsa bochabela, li ka hanang ho fa 'muso peo, ba be ba tseba hore ba na le sesiu sa naha. A khothaletsa hape hore hobe le meliko ea lipeo metseng mona, e holiso e ate e le hore e anele naha ka bophara." A tiisa hore leano le teng hajoale la lipeo ha le sireletse Litokelo tsa Mantlha tsa Botho tsa lihoai. A ipiletsa ho 'muso ho sireletsa lihoai ka tsela e totobetse e hlakileng le ho nkela hloohong meliko ea lehae ea lipeo.

Morena Mpiti Letsie o itse mosebetsi oa hae oa mantlha ke ho bona hore Mosotho ka mong o'na phelela, 'me o phela bophelo bo phelehang boo a tla ho itšoarella ka matsoho, e se ke ea eba lekhoba la mang kapa mang. A re mosebetsi oa hae ke ho batla litsebi ho tla fahlolla sechaba sa hae ka mekhoba e nepahetse ea ho iphelisa. Ka hona a tholetsa SMARTD ka hoba hlaha leseling mabapi ka temo e ntlafetseng, 'me ho se ho le ho motho ka mong ho inahana bocha, eena le ba lelapa la hae.

Lebitsong la lihoai Mofumahlali 'Maretšepile Letsatsi o thoholelitse SMARTD ka hoba hlahlella ka malebela a temo e ntlafetseng e ballang tikoloho, e sireletsa tlhohleho le ho fana ka bophelo bo botle. A tiisa hore leetong lena la bona ba khotse tse molemo tseo ba tlang ho li sebelisa ha ba fihla metseng ea habo bona, e le ho matlafatsa temo.

SMARTD ke mokhatlo o thusang lihoai ka ho lihlahlella ka malebela litabeng tsa temo-thuo, temo ea lijalo, tlhahiso ea farelane le seiboko e le ho ntlafatsa bophelo ba sechaba. O sebetsa haholo liter ekeng tsa Quthing, Qacha's Nek le Mohale's Hoek.



## Ha Tlhaku e'a ntlafala

### Tšeliso Thakholi

**M**orena oa Sebaka oa tikoloho ea Ha Tlhaku Morena Mpiti Letsie o re lintlafatso tse teng kahare ho tikoloho ea Ha Tlhaku e bopiloeng ka metse e 8. Tsona li kenyeletsa: phepele ea metsi metseng, temo e ntlafetseng, khaho ea marokho le paballo ea makhulo, tseo sepheo e leng ho tiisa liphetofo bophelong ba baahi ba metse ea tikoloho eo.

Puisanong le motlalehi oa Koranta ena, Morena Letsie o itse ho fihlela ha joale, ba atlehile ho baballa le ho sireletsa makhulo sebakeng sa Ha Tlhaku, e le ho boloka tikoloho ea bona e shebahala hantle e apere botala, ho loantša khoholeho ea mobu le tse ling tse phelang ka joang le mobu li ntse li phetseng hantle. Sepheo se sehola ke ho boloka tlhohleho, le ho bona hore bophelo bo teng ho eona.

Morena Letsie a bontša hore ntle ho moo ba atlehile ho ba le lipompo tsa metsi metse kaofela, bakeng sa ho noa metsi a hloekileng a bile a tšireletsehile khahlanong le likokoana-hloko. A re joalokaha tikoloho ena e le boliseng ba hae, e le kahare ho maloti, ba na le marokho a likoloi le a mao-

to moo sechaba sa teng se ka tšelang teng nakong ea lipula ho phetha mabaka a sona a fapakaneng a letsatsi ka leng, bophelo ba sona bo tšireletsehile khahlanong le ho nkoa ke linoka kapa linokana.

E le ho loantša bofuma, tlala le tlhokahalo ea mesebetsi o itse ba sebetsa ka matla bakeng sa temo, ho ithahisetsa lijo masimong ka tataiso le tšehetso ea Mokhatlo oa SMARTD, e le hore qetellong batle ba iphumane ba iphelisa ka lihlahisoa tsa bona ka ho fetohela ho temo-khoebo. A bontša hore leha lintlafatso li le molemong oa sechaba, ho ntse ho e-na le karolo e fokalang haholo ea sechaba se hlohang tsebo, 'me o tšore ka thata ho ruta sech-

aba le ho se batlela litsebi mafapheng a fapakaneng a bophelo ho se fumantša likoetliso molemong oa ho se fahlolla e le hore se ruoe tsebo ka bohlokoa ba bointlafatso.

Haele tabeng ea litlolo tsa molao teng, o itse li rothetse mona le mane kaha boholo ba sechaba bo lula bo phathahane ke litaba tsa temo. "Lipolao le bosholu li tšoha li le teng. Haele tlolo ea molao e kang ea mahlapa kahar'a metse eona re e phephethetse kaha ha o qosoa ka pelaello e joalo, re u fa bo-'m'e ba motse ba ke ba ipuoe le uena, 'me ha u khutla u ke ke oa hlola u pheta." Ke ena eo.

Karolo e kholo ea sechaba se phelang metse e oelang tikolohong ea Ha Tlhaku se

bonahala se ntse se phela joaloka Basotho ba mehla ea pele e leng ea boikopanyo, litabeng tsa temo e le ho fenyha tlala e bonahalang e haketse matsatsing ana, ka ho chakelana ka metse ho thakelana ka malebela bakeng sa temo ba ntse ba le tlas'a leihlo le matla la Mokhatlo oa SMARTD.

Sechaba sa tikoloho ena se tseba ho itšoarella ka matsoho litabeng tsa temo, se bile se ntsoe-leng hore temo ke mokokotlo oa naha, 'me kante ho temo ha hona bophelo. Ka hona 'muso o lokela ho kenya letsoho le toma ho se matlafatsa tlhahiso eo ba seng ba ntse ba e-na le eona, haholo-holo tlhahisong ea peo ea litapole, kaha mofuta oa lipeo tsa bona e le oa boemo bo holimo haholo kaha ba sebelisa manyolo a tlhao a kang a liphoofole.



# Shoeshoe ea Moshoeshoe e kena tšebetsong

## Nthabeleng Seithleko

**K**hosatsana Senate Seeiso Seeiso o thakhotse morero o bitsoang Shoeshoe ea Moshoeshoe e le ho khahlametsa baithuti likolong tsa tikoloho ea Matsieng ba hlokang, le ho arabela lithoko tsa bona tsa ka mehla. Morero o thakhotsoe ka la 10 Tlhakubele monongoa.

O re ha ba tla keteka letsatsi la Moshoeshoe le ho tsoaea lilemo tse 200 sechaba sa Basotho se thehiloe o theha mokhatlo oa bacha, oa pele oa ho tsamaisa litaba tsa khotso, polokeho le kopano.

O re ba tla fana ka liaparo tsa sekolo ho baithuti ba likolo tsa mathomo le likolo tse phahameng o tla nehelana ka mesangoa ea bohloeki. O re morero ona o tla fana ka lihemphe, mese ea letheka, libuka le tse ling tse ngata. O re o kopa sechaba sa Basotho ho tšehetsa morero ona haholo bacha ba Lesotho ho ntlafatsa le ho phelisa se-moshoeshoe.

Nkala Makabane Mookameli oa Maseru Mall o itse libakeng tsohle tsa moaho oa Maseru Mall, ba tla be ba behile mabokose a



liphallelo, 'me ba tšepisa hore ba tla tsamaea 'moho le Khosatsana hofihlela ba fihletse ngo-

O re ba ikemiselitse ho beha mabokasana ho fihlela nako eo Khosatsana a tla hlalosa hore

bareki ba Maseru mall ho sebelisa mabokose ao. A re bana le bahiri ba 103, 'me ke hona ba tl'o fetola

Mantšebo Ntaote Motlatsi oa Mongoli e Moholo Ofising ea Motlotlehi, o re litaba tsohle tse amanang le mesebetsi ea Khosatsana Senate li ikarabella Ofising ea habo. O re ho etsa hanyane ha ho tsoane le ho lula feela, ba shebane le tikoloho ea Matsieng le likolo tsohle 'me ba tla laoloa ke hore na ka mokotleng ho kene chelete e kae hore qetellong morero o tle o anele le Naha ea Lesotho.

O re morero o moholo ke ho bona hore ba tsoelapele ka morero ona ha ba ile ba thusa bana ba tla lula ba ba tšehetsa hore qetellong bana bohle bao a tlang ho ba thusa ba be le bokamoso bo chabileng. A qalile le ngoana ho tloha tlaase ho fihlela a hola hore ho bonahale phetoho.

O re ba tla kenya letsoho ka matla litabeng tsa thuto ka tsela e pharalatseng, o ile a anetsa thuto ea bochaba kahar'a bana ba Basotho selemong sa 2025 e le karolo ea ho ba kenya moea oa boikhopolo ho bona hore ba anetsa thuto.

O re e 'ngoe ea thuto ke litaba tsa ho buisana le bacha ka ho nena lithetefatsi le lenyalo ba sa le tlaase lilemong. Ke morero oa moshoelella 'me qetellong o rata ho bona hore batho bohle ba fihlela likolong.



ana e mong le e mong oa Lesotho.

ho se ho tšetsoe, 'me ba khotlaletsa bahiruo a le

bophelo ka ho kenya letsoho litabeng tsena.





# TSA KEREKE

## Deanery ea Mazenod e khetha komiti

### Staff

**L**ikomiti tsa liparish le limmishone tsa deanery ea Mazenod li khethile komiti e ncha e tla nka lilemo tse tharo kaofela. Tse na li bile St. Sabastain Ha Mohasoa lekaleng la Mofumahali oa Lefaatše ka la 7 Tlhakubele monongoaha.

H'a nehelana ka lesokoa-na letsatsi le chabile ntate Samuel Mabina oa St. Louis Matsieng o itse ketapeleng ea hae o bopile kopano ea Cecilia hore litho tsa eona ebe ntho e le 'ngoe, ba tsebane ka ho thakelana ka malebela a ho holisa kopano, ba be le bonngoe joalokaha e le kereke e tsamaeang 'moho.

A re o rutilo litho tsa kopano ho etsa mesebetsi ea kereke ho sena liqhobashano, haholo ha ba tla

sepheo sa ho tsoolosa litho, ho bopa bonngoe le ho hlokomela baprista ba bona le Rameea oa kopano boemong ba deanery. Taba e 'ngoe ea bohlokoa e ne e le ho ntšetsapele mesebetsi oa kopano hohle moo e thehiloeng, e le ho ruta bakriste le phutheho ea Morena Molimo ho bina hammoho, hamonate hobane "ho bina ke ho rapela habeli" joalokaha Augustunus ea Halalelang a boletse, le hore litšebeliso tsa Sehlabelo sa 'Missa li tsamaee hantle hobane ke bona tomoso.

A re kopano ea Cecilia kahar'a deanery e bonahala e hola ka sekahla se holimo, 'me seo se pakoa ka litho tse ncha tseo esale li amoheloa ho tloha ka 2023 ho fihlela 2025. A re 'Mishone oa St. Peter Clever, Tšoeneng, o ne o bonahala ho se litho tse titimelang kopanong, empa morao tjena ho bonahala phetoho e kholo, 'me taba eo ke katleho e

lisa linku tse laolehang. A re ba tsoelepele ho tšehetsa litho tse ncha tse tlang ho qala mesebetsi, e be ba khethile ka tšepo e kholo e seneng ho tla ba phoqa kapa hona ho ba tšeha le hoba etsa lisebelisoa tsa bona.

Haele Motsamaisi 'Maletlatsa Bernardett Polata, ho tsoa 'Mishoneng oa St. Joseph Koro-koro o re ba ile ba kenela boithuto boithlahlobo, 'me ke moo baithutleng lifela tse 12 ka mekhahlelo ea teng. Ke mokhahlelo oa C Section, Starndard, Large le Champ of Champs. 'Me lifela tsa 2023 ke sefela nomoro ea 135, 171, 139, le 107, ha ka 2024 ea ba tsa 40, 58, 89, le 15, 89, 40, 58, le 151, ka 2025 ebile tsa 172, 48, 215 le 148. 'Me a bontša deanery e ile ea sebetsa hantle haholo hobane kaofela ba ile ba tla le mehope e mengata, eo hamoro e ileng ea baka litaba le marata hore



ba shebile mesebetsi ea kereke. A re e le kopano ba ile ba ikeletsa hore kahar'a lilemo tse ncha tse tharo tsa ketapele ea hae ba ke ba tlotle liqhuku tsa kopano haholo tse seng li qetile lilemo tsa 50 ho ea holimo. A re ba ile ba ba etsa mangolo le mabekere a tla lula e le liemahale kahar'a malapa a bona le molokong o tlang. 'Me taba eo e bontša hore hoja ha se ka bona, mohlomong kopano ena e kabe e le sieo kahar'a deanery ea Mazenod. Hape le ho ba bontša hore ba bohlokoa 'me ba nyantse tse molemo ho bona, ba se khathale ho ba tataisa hore kopano e 'ne e hole.

Deanery ea Mazenod e ne e etsa potoloho ka

kholo. H'a phethela litaba tsa hae a re se entseng hore a atlehe mesebetsing oa hae, ke ho sebetsa le litho tsa habo ka khotso, le ho shebisana litaba le bona, esita le Rameea oa bona hobane ke eena 'mesa mohloane. A re ka 2023-2024 ba ile ba apesa bokokoti ba 14, ha ka 2025 ba ile ba ba 20. Leha ho joalo, o hlalositse a ne a tšoenyeha haholo ke sekahle seo litho li neng li hlokahala ka sona hobane seo se ne se thefula kopano.

A re o leboha litho ka tšehetso eo li mo fileng eona leetong lena, etsoe ho sena tsela e se nang moepa. A re molisa o ba teng hobane linku li le teng, 'me o ne a

na ho tla joang hore deanery e hape kaofela, empa khabareng ba hlotsoeng ba ile ba qetella ba amohetse tlhoko mehope e ntse e le teng lapeng.

Komiti e ncha eme tjena: Mookameli, Ishemael Makhele St. Louis Matsieng, Motlatsi: Poulo Michael Mohapi Mofumahali oa Lefaatše. Motsamaisi: 'Maletlaka Bernardett Polata St. Joseph Koro-Koro le Lebhang Samuel Makhetha St. Louis Matsieng. Mongoli: 'Mantsane Mary Sekhalo Mofumahali oa Masabiella. Motlatsi: 'Makarabo Amelia Nthapo St. Peter Clever Tšoeneng. Ramatloto: 'Malebohang Melidah Monyau St. Sabastian Ha Mohasoa.

## 2025-2026 SELEMO A

### SONTAHA SA 4 SA KARISIMA



1 Samuel 16:1.6-7.10-13

Pesalema 22

Ba-Efese 5:8-14

Joannes 9:1-41



### Khothatso

#### Ke 'na leseli la lefatše

**K**a Sontaha se fetileng re bone hore metsi ke ntho e hlokahalang haholo bophelong ba motho, 'me re utloile hore ka Hlatsuo, Kriste o re nehile metsi a mohlolo a re hloekisang, metsi a phelisang, a re etsang bana ba Molimo, 'me a re isang bophelong bo sa feleng leholimong.

Kajeno re hlalositsoa ntho e 'ngoe e kholo e hlokahalang haholo bophelong ba rona, empa eo re sa e eleloeng, hobane re tloaetse ho e bona: ke leseli. Re bolellao hore Jesu ke leseli la lefatše, ke eena ea re khantšetsang ka leseli la hae mohl'a Hlatsuo ea rona.

Ha re le lefifing, re tsietsing ruri. Lintho tse lokileng le tse sa lokang li kopakane 'me li'a tsoana, re sitoa ho li hlalohanya. Tse ntle le tse mpe li na le 'mala o le mong; botšo. Batho le bona baa tsoana, re sitoa ho khetholla motsalle ho sera. Re sitoa ho sebetsa hobane ha re bone seo re se etsang. Re sitoa ho tsamaea hobane ha re bone tsela, re ka oela habonolo mangopeng le lilomong. Re lahlehile, re utloa mokhoathatsa 'me re qala ho tšaba hobane ha re bone: mohlomong ke metsoalle, mohlomong ke likoeta. Ha re bone batho ba ka re pholosang, leha ba le haufi le rona. Kahohle ke kotsi, hobane ha re bone moo re hatang teng.

Athe hang ha letsatsi le chaba, re hlokomela moo re leng teng, re bona moo re lebang teng, le eona tsela e'a bonahala, 'moho le mathata a eona a likotsi tsa eona. Empa leha mathata a le mangata, ha re sa tšaba letho hobane re bona moo re hatang teng.

Re elelloa bohlokoa ba leseli ha le sieo. Le teng re bona bohlokoa ba lona ha re tali-ma lifofu le mathata a tsona, kamoo li tsamaeang ka thata ka teng leha tsela ea tsona e otlohlile, kamoo li lahlehang 'me li oelang habonolo kateng ha li hloka motho ea li tataisang.

Evangeli ea kajeno e re bolella mohlolo oa Jesu ea folisang monna ea tsoetsoeng e le sefoku. Hang hoba motho enoa a qale ho bona, a lumela, a sala Kriste morao 'me a phatlatsa tumelo a sa tšabe letho. Evangeling eona ena, re bona le Bafarisi ba loantšang leseli 'me ba ratang ho le timetsa. Re bona le batsoali ba sefoku ba tšabang leseli le tholoana ea lona e leng 'nete, ba tšabang ho thophotheloa ke lona le ho le sala morao.

Jesu Kriste ke eena leseli la 'nete. O tiile lefatšeng ho tla khantšetsa batho bohle. Lefatše ha le amohela leseli lena, empa bohle ba le amohelang, ke hore ba lumelang ho Kriste 'me ba mo salang morao, ba fetoha bana ba Molimo.

Leetong la rona la bophelo, re hloka leseli le re bonesetsang tsela, le re tlatsang ka tšepo le khothatso 'me le re sireletsang likotsing le melekong. Leseli lena le teng, ke leseli la Molimo ka sebele. Ke eena Jesu Kriste ka sebele ea re bonesetsang, ea retataisang 'me eo re ka itsoarellang ka eena le ho beha tšepo eohle ea rona ho eena.

Moapostola Paulosi o re: "Pele le ne le le leffifi, atha kajeno le leseli ho Morena; joale phelang joaloka bana ba leseli." Mantsoe ana h'a lebisoe ho bakatekumena kapa bakriste ba bacha fela, empa a lebisoa ho e mong le e mong oa rona nakong ena ea Karisima. Re na le leseli la tumelo, re furaletse leffifi le neng le re aparatse, 'me re tsamaea tseleng ea leholimo, re ntse re sa lebele litholoana tsa leseli, e leng tse lokileng, tse ntle le tsa 'nete. Re tseba hore ha re ka tsamaea joalo re tla khahlisa Morena 'me re tla finyella leholimo leo Morena Molimo a re lokiselitseng lona mohaung oa hae le leratong la hae.

Linnete tse ntle rea li tseba. Leha ho le joalo, re hloka ho hlokomelisoa nako le nako, hore, ha re le bana ba leseli, ha re lokele ho ba le kopano le mesebetsi e se nang thuso ea leffifi. Moleko o moholo oa rona ke ho robala, ho ba botsoa le ho lebala moo re eang teng. Mohlomong ha re time lebone, ha re itahlele lefifing, empa leseli le re etelang pele tseleng, re le sala morao butle, re le hole, 'me re sitoa ho khantšetsa liketsahalo tsohle tsa bophelo ba rona, kamoo le lokelang ho etsa kateng.

Leseli lena leo re le fumanang Hlatsuong ea rona ha le na ho tima, ha re hlokomela ho sala Kriste morao le ho hata mehlaleng ea hae, ka ho mamela lentsoe la hae le ka ho ja lijo tseo a re fileng tsona. Leseli la rona le tla khantšetsa ba bang 'me le tla ba tsamaisa le ho ba thusa hoo fumana, toka, 'nete le lerato la Molimo.

## Bahalaleli har'a Beke

16	Tlhakubele	Abban
17	Tlhakubele	Gertrude oa Nivelles
18	Tlhakubele	Salvatore
19	Tlhakubele	Joseph
20	Tlhakubele	Benignus
21	Tlhakubele	Enda

# O matlafatsa sehlopha sa naha

**Tšelisothakholi**

**M**okoetlisi ea seng a ena le libeke tse tharo a qalile tšebetso sehlopheng sa naha sa Likuena, Monghali Atang Bob Mafoso, o matlafalitse sehlopha sa Likuena ka libapali tse ncha tse 7, e le ho itokisetša lipapali tsa mokhahlelo oa pele oa mantšano oa Litlholisano tsa Bompoli ba Linaha tsa Afrika (AFCON 2027) khahlanong le Naha ea Seychelles, moo lipapali tsena bobeli li tlang ho bapalloa Bloemfontein, Afrika Boroa, ka la 26 le la 29 Tlhakubele monongoaha.

Libapali tsena tseo e seng e le karolo ea sehlopha ho itokisetša AFCON ke Sanele Phantši ho hlaha sehlopheng sa LMPS, Thabo Mafatle ho hlaha ho Bantu, Tšepo Toloane ho tsoa ho LDF, Paseka Bale ho hlaha sehlopheng sa Machokha, Mpho Teele ho hlaha ho Lijabatho le Tsoatang Malesela ho tsoa ho Manonyane. Libapali tsena har'a tse ling li khethiloe ho ipapisitsoe le makhabane a tsona a kang a boitšoarō, na ke batho ba ka lumelang ho koetliseha,

na ba mamela bakoetlisi le ho ba le kutloisiso ea hore ha ba bapalla sehlopha sa naha ba emetse naha ka kotloloho. Ka hona tšepo eohle ea sechaba sa Basotho e ho bona.

Sehlopha sena se qalileng boikoetliso ka matla

ea itokisetša lipapali tsa Liki e Kholo ea Vodacom e seng e kapile mollo matsatsing ana.

Likuena e tla bapala mokhahlelo oa pele oa AFCON le Seychelles e-s'o kaba e bapala leha e se e le papali e le 'ngoe feela ea

bohlale ba hore a 'ne a fetofetole le ho matlafatsa mona le mane a ipapisitse le tsela eo libapali tsa hae li ntseng li bapala ka eona lipapali tse liki.

Lehlohonolo le leng la Mokoetlisi Mafoso ke hore boholo ba libapali tseo a

pa le sona hore se matla, 'me se khethiloe ka nepo sehlopheng sa naha.

Le ha ho le joalo, mokoetlisi ha e-s'o phatlalatse ka molao mabitso a 25 a sehlopha sa mapomelo se tlang ho e hlanaka papaling ea sona le Seychelles. Ho feta mona libapali tseo mokoetlisi a qalileng boikoetliso ka tsona e sa ntse e le tsa lihlopha tsa hae mona feela, 'me tse bapalang linaheng tse kantle ke hona a tla li bitsa ha lipapali li se li atametse, ho tla koetla 'moho.

Barati le batšehetsi ba bolo ea maoto ba tiisitse hore ho tloha haesale Likuena e qala boikoetliso ba bona, phetoho e kholo lipapaling tsa liki ka hore bahlankana ba bapala papali e tsoileng matsoho. Ba etsa mohlala ka lipapali tsena tse tsoa feta tse bileng ka lebaleng la Setsoto, hore ka lebaka la boitokiso ba Likuena e bile tsa boemo ba phahameng haholo, papising le lipapali tsa ho feta. "Nete sehlopha ka seng se tseka ho hapa liki ha tse ling li baleha ho rathoa ke selepe, empa boikoetliso ba Likuena bo tlišitse pheto e kholo kahare ho lipapali tsa rona tsa liki." Ke bona bao.



tlas'a leihlo le nchocho la Bop Mafoso, se ikoetlisa hararo ka beke e leng Mantaha ho isa la Boraro, Lebaleng la Bambatha Tšita Sports Arena, e ba matsatsi a mang a setseng ba khutlela lihlopheng tsa bona ho

machaba ea setsoalle, 'me ho fihlela hajoale e ntse e thusoa haholo ke lipapali tsa Liki e Kholo ea Vodacom, kaha li bonahala li le matla haholo ha lia li lebile khoele. Sena ke sona feela se ntseng se fa mokoetlisi

li khethileng li'a bapala lihlopheng tsa tsona mafelo a mang le a mang a beke. Ka lehlakoreng le leng boikoetliso bona ba Likuena bo boetse bo phahamisitse lipapali tsa Liki haholo, kaha sebakali ka seng se ea itšus-

## Nanabolele e tla hapa mojao

**Tšelisothakholi**

**S**ebini se secha haholo sa 'mino oa Jazz/Afropop e bile e le seroki, Maba-Enar Loape ea tsebahalang haholo selikalikongeng sa 'mino ka lebitso la Flabie, o re setlabolane se mathe-maloli seo a ntseng a se pheha se tšil'o tsoa mafelong a khoeli eona ena ea Tlhakubele se bitsoang 'Nanabolele' se tšil'o hapa mojao oa hoba e 'ngoe ea lipina tse tla itlhomla pele ka ho ratoa selemong sena.

'Mino oa Jazz/Afropop o bonahala o ntse o nyoloha ka potlako, o ile oa tumisoa ke libini tsa Lesotho le Afrika Boroa, 'minong ona ke moo batho ba ntšang mabina-bine a lipelo tsa bona ka puo ea Sesotho, le ha ka nako e 'ngoe ba ntse ba tsoaka le ka puo ea Sekhooa. Setlabolane sena seo Flabie a tla se lokolla barati ba bangata ba 'mino oa Afropop/Jazz ba tšil'o matha mpetleke ho se batla ka lebaka la monate oa sona.

Flabie o hatisa pina ka 'ngoe 'me ho fihlela hajoale o se a hatisitse tse tšeletseng,

e leng Thaba-Bosiu, Lesotho ke lapeng, Babe Whami, Nanabolele le Qekekane, e ileng ea ratoa haholo ngoahola kaha a ne a bile a kenetse litlholisano tsa National Music Awards ka eona, 'me ea ipabola hoo e seng e bile e le eona sehlooho sa tšoantšiso e bitsoang 'Lieme ka lekoa.'

O re molaetsa oa pina e ncha o fupere nalane, puo le lingoliloeng tsa khale kaha a e ngotse ho hlaha litšomong tsa Sesotho. Morero o moholo ka eona ke ho ruta moloko o mocha ka puo le bochaba ba bona le ho ba hopotsa hore na ba tsoa kae, ba ea kae, e tsoe moloko o sa tsebeng moo o tsoang teng o'a timela. Boholo ba 'mino oo Flabie a seng a o hatisitse morero ke ho tsoalosa bochaba ba Basotho 'moho le bo-Afrika le nalane ea Basotho e le hore e lule e ntse e phela le molokong o mocha.

Flabie ea qalileng ho bina ho tloha h'a le lilemo li robeli, eo hajoale a seng a ipabola ka 'mino o hlabosang, nako le nako o ipapatsa libakeng tse fapaneng tsa boithabiso. 'Mino oa hae o fumaneha libakeng tse fapaneng tsa thekiso ea 'mino ka marang-rang,

'me hang ha Nanabolele e tsoa le eona ka mokhoa o tšoanang e tla fumaneha habobebe ka marang-rang kaha sepheo e le ho fana ka thuto ho bacha.

Ka lebaka la lerato le te-

bileng la nalane le bochaba ba Basotho, khalala ena ke e mong oa baqapi ba pina ea mohoo oa lipapali tsa Commonwealth tse tšil'o bapala monongoaha. O boetse o e ntse pokello ea

lithoko ngoahola ka Morena Moshoeshe, ha Naha ea Lesotho e ne e keteka lilemo tse 200 e ipusa. Ho feta mona har'a lipina tse hae Fabie ona le tse il'o sebelisoa tšoantšisong e bitsoang 'Kabelo' e il'o bapaloa moketeng oa boithabiso oa Johannesburg Film.



# Ba leba Mozambique

## Tšeliso Thakholi

**B**ompoli ba Lesotho ba papali ea Beach Volleyball ba tliil'o sirelet-




sa sekola litlholisanong tsa mokhahlelo oa bobeli oa lipapali tsa CAVB Zone VI Beach Volleyball tse tliil'o tsoareloa Maputo, Mozambique, ka la 13 ho isa la 15 Tlhakubele monongoaha. Sena se latela hore libapali

tsa Lesotho tsa Beach Volleyball li atlehe hoba bompoli ba Tikoloho ea Afrika ba papali ena, kamor'a ho ikhapela tiholo litlholisanong tsa mokhahlelo oa pele tse neng li tsoaretsoe Windhoek, Namibia, ka la 21 ho isa la 22 Hlakola monongoaha, moo likhalala tsa Lesotho Neo Chapole le Mroesi Tolofi ba ileng ba beha Naha ea Lesotho maemong a pele Tikolohong ea Afrika. Mokhahlelong ona oa bobeli, Sehlopha sa Naha sa Beach Volleyball se tšehelisoeng ke Komiti ea Lesotho ea 'olympics' (LNOC) ha se ea fetoha, se ntse se arotsoe ka lihlopha tse tharo tse bopiloeng ka libapali tse peli sehlopheng e leng Mroesi Tolofi le Neo Chapole, Moleboheng Mofolo le Itumeleng Mareka, Pale-

sa Mapota le Relebohile Ndaga. Haele mokoetlisi oa bona ke Thabiso 'Killer' Maboee ha mookameli oa

sehlopha e le 'Maleteketoa Sekhonyana.

Ho ea ka mookameli oa sehlopha Mofumahali 'Maleteketoa Sekhonyana o re sehlopha se malala-a-laotsoe ho ea e hlanaka Naheng



# E senyetsa Lijabatho semate

## Tšeliso Thakholi

**T**šepo ea sehlopha sa Lijabatho e neng e se e li hula pele lokong ea hore e ka hapa Mohope oa Liki monongoaha, e ile ea nyamela joaloka moholi ha letsatsi le chaba kamor'a ho shapuo ea Majantja ka thupa ea 2-1, papaling ea bobeli e neng e bula Lebala la Setsoto ka la 8 Tlhakubele monongoaha.

Ka lintlha tse hlabiloeng ke Teboho Berente metsotsoeng e 'meli pele lia khfutsoeng, le Limpho Motanya ea ileng a e hakisa letlooa ka hlooho metsotsoeng ea ho qetela ea papali, e ne e le ha Majantja e senyetsa sehlopha sa Lijabatho monyetla oa hore se ka hapa liki e bile e se theola maemong a pele lokong ao e saleng e tsorama ho ona ho tloha ha selemo sena se thoasa.

Majantja e ntseng e loanela ho ba kahar'a lihlopha tse 8 tse ka holimo lokong, ha selemo sena sa lipapali se fihla pheletsong, e theole-tse Lijabatho boemong ba boraro ka lipapali tse 21, ea hapa tse 12, ea lahlehela ke tse tharo ea bokeletsa lintlha-kholo tse 42 ka mokotleng. Athe Majantja eona e ntlafalitse maemo

lokong ka ho nyolohela boemong ba botšelela ka lipapali tse 22, ea hlola tse 10, ea lahlehela ke tse 'ne, e na le lintlha-kholo tse 38 ka khetsing.

H'a hlalosa kamor'a papali Mokoetlisi oa sehlopha sa Majantja, Monghali Bafokeng Mohapi o itse bona ba khotsofalletse tšebetso e ntle ea sehlopha ea ho hapa papali eo ka lintlha tse peli ho e le 'ngoe, kaha e ne e le bohlokoa haholo ho bona hore ba e hape. A re nako ena ke e boima haholo ea liki kaha li se li fula li shebitsitse manaka hae, 'me seo ba se shebileng ha se ho

hapa liki kaha eng kapa eng e ka etsahala papaling ea bolo ea maoto. Ka hona ba shebile feela ho itokisetsa papali tse ba saletseng ho fihlela ba phethela liki.

A re libapali tsa hae e ntseng e le batho ba banyenyane haholo lilemong, ba e-s'ong hobe maemong a matle haholo a papali, 'me h'a batle hoba beha tlas'a khatello ea hore ba hape liki, empa seo a se etsang ke hore ba tsepamise maikutlo ho lim'a papali ka 'ngoe, etsoe bona ka ba ntse ba le tlas'a khatello e matla ea hore batšehetsi ba batla mosebetsi o tsoileng matsoho oa

ho hapa lipapali tse ba saletseng.

A qetella ka hore ba ka ba ntse ba sebelitse ho feta mona, empa seo a ileng a ithuta sona ke hore ba bang ba libapali ba ne ba batla ba sa phuthuloha haholo, kaha e ne e le lekhetlo la bona la pele ba bapalla kapel'a letšoele le neng le tletse lebala tsoete! A re taba eo e ile ea kenyetsoa ba bang letsoalo.

Ho sa le joalo, lipapali tse ling tse ileng tsa bapala ka Moqebelo li ile tsa ema tjena; Lifoane 2-3 Lioli, Liphakoe 0-1 Matlama, Linare 2-1 Bantu.

ea Mozambique, le hoja ba bile le nako e khutšoanyane haholo ea boikoetliso kamor'a hore ba khutle mokhahlelong oa pele o bileng Namibia ka Hlakola. O re leha moea oa tiholo o phahame kahare ho libapali, qholotsonyana eo ba ileng ba kopana le eona ha ba khutla Namibia ebile hore boholo ba libapali bo ile ba khathatsoa haholo ke sefuba ka lebaka la ho kopana le maemo a fapakaneng a leholimo.

A bontša hore ba se ba ntse ba sebetsana le boemo boo ka matla a maholo e le hore ba tle ba tsebe ho boela ba tlela Basotho le Lesotho tiholo lekhetlo la bobeli. A re ha ba ka boela ba sebetsa hantle seo se tliil'o matlafatsa maemo a bona lethathamong la Afrika la papali ea Beach Volleyball. A leboha tšebetso e matla eo ba ntseng ba fumana ho sechaba sa Basotho, 'me a ba kopa ho se emise ka tšebetso ea bona, kaha ke ka eona ba tla tseba ho tsoelapele ho sebetsa ka thata ho khutla le tiholo.

A qetella ka ho tšepisa hore le hoja maemo a lifuba a ntse e-s'o ee moriting, joang kapa joang ba ikemiselitse ho loana ntoa ea selula-matsoapong ho tla le mohope lekhetlo la bobeli. Ke linaha tse leshome tsa Afrika tse lebeletsoeng litlholisanong tse. Naha ea Lesotho e boemong ba bone lethathamong la linaha tse 145 tsa Afrika tse bapalang papali ea Beach Volleyball.

